



Promover la diversità linguistica en Svizra è il motiv per il sustegn dals cineasts rumantschs per la nova lescha da radio e televisiun.

MAD

Per amur da la diversità

Cineasts rumantschs sa engaschan per la nova lescha da radio e televisiun

■ (anr) La gruppa «Cineasts independents rumantschs» fa valair la gronda impurtanza da la SRG SSR per la promozion da films independents da tuttas regiuns linguisticas svizras e furmar uschia ina punt sur ils cunfins da la lingua. Per quai sustegnan ils cineasts rumantschs la nova lescha da radio e televisiun en votaziun ils 14 da zercladur. Tranter auter cun in filmin. *Ivo Zen*, il timun da la gruppa dals cineasts independents rumantschs, ha fatg valair ch'ils cineasts rumantschs veglian s'engaschar a favur da la nova lescha da radio e televisiun en votaziun ils 14 da zercladur. En ina comunicaziun ha puntuà Ivo Zen ch'è saja dad engraziar a la SRG SSR ch'è dettia insumma radio e televisiun en lin-

gua rumantscha. Economicamain na saja ina purschida per ina lingua minoritara sco il rumantsch numnadamain insumma betg. La clav da repartiziun solidarica entaifer la SRG SSR pussibiliteschia er in program adequat per rumantsch e promovia uschia la diversità linguistica en Svizra. Quai saja enconuscent e tuttina da muntada enorma – spezialmain per noss chantun triling, scrivon ils cineasts independents en ina comunicaziun. Els èn vinavant da l'avis che per il kino indigen ed ils films independents saja la SRG SSR da gronda impurtanza. Cun divers instruments da promozion (Pacte de l'audiovisuel, Succès passage antenne) sustegnia ella mintga onn numerus films independents – er en lingua rumantscha. Per

exempel il film «Jon, Marchet e Braida ad alp» da *Susanna Fanzun* cun il titel tudestg «Kühe, Käse und 3 Kinder» che vegnia proximamain en il kino. Uschia possian films far punts tranter las regiuns linguisticas en Svizra. Era questa funcziun da la SRG SSR muntia ina contribuziun preziosa a la diversità culturala! Ils cineasts rumantschs viseschon a la votaziun dals 14 da zercladur e proponan da nezegiar la pussaivladad da segirar la finanziaziun da la SRG SSR a lunga vista cun in sistem effizient e gist. «Per amur da la diversità!» Il sustegn da la lescha mussa la gruppa independenta dals cineasts rumantschs cun in filmin. Da vesair sin www.cineasts.ch. U via il link: <https://www.youtube.com/watch?v=W-i0G0D1QgQ>